

ՔՐԻՍՏԻՆԵ ԿՈՍՏԻԿՅԱՆ

Պատմական գիտ. դոկտոր

ՄՄ, ՀՀ ԳԱԱ ԱԻ, ԵՊՀ, ՀՌՀ

ՍԱՅՐ ԱԹՈՒ Ս. ԷԶՄԻԱԾՆԻ ԱՐԽԻՎԻ ՊԱՐՍԿԵՐԵՆ ՊԱՏՄԱԿԱՆ ՓԱՏՆԱԹՂԹԵՐԸ¹

Սայր Աթոռ Սուրբ Էջմիածնի կաթողիկոսական դիվանը, որը մաս է կազմել Էջմիածնի մատենադարանի ձեռագրական հավաքածուի, խորհրդային տարիներին այդ հավաքածուի հետ պետականացվել է եւ ներկայումս պահվում է Երեւանի Մեսրոպ Մաշտոցի անվան Մատենադարանի արխիվում: Մատենադարանի կաթողիկոսական դիվանի մաս են կազմում շուրջ 2000 պարսկերեն վավերագրերը, որոնց մեջ են ոչ միայն Էջմիածնի կաթողիկոսների ձեռք բերած պարսկերեն զանազան փաստաթղթերը, այլեւ մի քանի հայկական վանքերի՝ մասնավորապես Ագուլիսի Սբ. Թովմա Առաքյալի, Դարաշամբի Սբ. Ստեփանոս Նախավկայի եւ Մակվի Սբ. Թադեի արխիվային նյութերը, ինչպես նաեւ Արցախի ու Ատրպատականի տարբեր վայրերից խաչիկ վրդ. Դադյանի հավաքած վավերագրերը:

Մատենադարանի կաթողիկոսական դիվանի պարսկերեն վավերագրերը բարձրարժեք պատմական փաստաթղթեր են, որոնց բովանդակած տեղեկությունները եւ տվյալները մեծ կարեւորություն ունեն ժ.Դ.–ԺԹ. դարերի ինչպես Իրանի, այնպես էլ Արեւելյան Հայաստանի ու հայ ժողովրդի, նաեւ հայ-իրանական հարաբերությունների պատմության ուսումնասիրության տեսանկյունից: Դրանք միաժամանակ նաեւ Իրանի մշակութային հարուստ ժառանգության մաս են կազմում եւ կարեւորվում որպես պարսկերեն գրագրության նմուշներ: Այս վավերագրերը մշտապես արժեւորել եւ բարձր են գնահատել հայ հետազոտողները, իսկ նախորդ դարի 50-ականներից Հ. Փափազյանի ջանքերով սկիզբ է դրվել նաեւ «Մատենադարանի պարսկերեն վավերագրերի» շարքի հրատարակությանը, որոնցում այդ վավերագրերը համակողմանի ուսումնասիրվել եւ հայերեն, ռուսերեն, հետազայում նաեւ անգլերեն թարգմա-

¹ Ստացվել է՝ 23.04.2023, գրախոսվել է՝ 2.05.2023; էլ. հասցե՝ kr.kostikyan@gmail.com:

նություններով ու գիտական մեկնաբանություններով ներկայացվել են գիտական լայն շրջանակին:

Մի քանի տարի առաջ հայտնի դարձավ, որ ներկայումս Մայր Աթոռ Սբ. Էջմիածնի արխիվում եւս պահվում է պարսկերեն տասնյոթ վավերագիր: Ուսումնասիրությունը ցույց տվեց, որ դրանք սերտորեն կապված են Մատենադարանի կաթողիկոսական դիվանի պարսկերեն փաստաթղթերի հետ, առնչվում են նույն խնդիրներին եւ լրացնում են միմյանց:

Ստորեւ կներկայացնենք վերոհիշյալ վավերագրերից մի քանիսը՝ համեմատելով եւ համադրելով դրանք Մատենադարանի համանման վավերագրերի հետ:

Ժամանակագրորեն հնագույն վավերագիրը Սեֆյան շահ Աբաս Բ.-ի հիշրայի 1060 թ. ռաբի՝ Ա. ամսի (1650 թ. մարտի 4 – ապրիլի 3) հրովարտակն է՝ հրապարակված Փիլիպոս կաթողիկոսի խնդրանքով (հ. 390): Վավերագրում նշվում է. քանի որ կաթողիկոսը, զգալի ծախս կատարելով, Կարսի կողմերից ջրանցք է կառուցել՝ այնտեղից 7–8 ջրաղաց աշխատեցնող ջուր բերելու համար, ուստի կարգադրվում է Վաղարշապատ գյուղի մանալ հարկի² գանձումը, որը նախկինում որպես համեսալե³ տրամադրվում էր Երեւանի բեկլարբեկին, վանքի միաբաններին հանձնվի: Նշվում է նաեւ, որ կաթողիկոսի խնդրանքին իր գրավոր համաձայնությունն է տվել նաեւ Երեւանի բեկլարբեկ Քելիսոսով խանը: 2014 թ. Մատենադարանի նորահայտ վավերագրերի շարքում հայտնաբերվել էր նույն վավերագրի պատճենը՝ առանց որեւէ նոտարական հաստատման, որի բնագիրը հայերեն թարգմանությամբ Հ. Գեւորգյանի հետ համահեղինակությամբ հրատարակել ենք «Բանբեր Մատենադարանի» հանդեսի էջերում⁴: Էջմիածնի ար-

² Մանալ (منال) – սկզբնաղբյուրներում եւ վավերագրերում երբեմն մալ եւ ջահաթ (մալոջահաթ) հարկային եզրույթի փոխարեն հանդիպում է մալ եւ մանալ (մալոմանալ) եզրույթը, որից կարելի է ենթադրել, որ ‘մանալ’-ը փոխարինում էր «ջահաթ» կամ «մութավաջջահաթ» եզրույթներին: Սակայն որոշ դեպքերում այն օգտագործվել է իրեն համանիշ «մալի» կամ ընդհանրապես «մալոջահաթի» իմաստով (Հ. ՓԱՓԱՋՅԱՆ, Մատենադարանի պարսկերեն վավերագրերը, հրովարտակներ, պրակ Բ., Երեւան, 1959, էջ 223):

³ Համեսալե (همه ساله) – այսպես էր անվանվում ոռճիկների հատուցման այն ձեւը, ըստ որի՝ ոռճիկ ստացող պաշտոնյան իրավունք էր ստանում, ցնոր տնօրինություն, ամեն տարի նույն վայրի հարկերի հաշվից ստանալու իր ոռճիկի գումարը: Այսպիսի իրավունք ստացող զինվորականներն ու պետական պաշտոնյաները կոչվում էին «համեսալեդար» (Հ. ՓԱՓԱՋՅԱՆ, հրովարտակներ, պրակ Բ., էջ 221):

⁴ Ք. ԿՈՍՏԻԿՅԱՆ, Հ. ԳԵՎՈՐԳՅԱՆ, Սեֆյան շահերի նորահայտ հրովարտակները Մատենադարանի կաթողիկոսական դիվանում, Բանբեր Մատենադարանի, 26, Երեւան, 2018, (58–75) էջ 68–70:

խիվի վերոհիշյալ փաստաթուղթը, փաստորեն, հիշյալ վավերագրի բնօրինակն է, որի մասին հայտնի չի եղել ոչ մեզ, ոչ էլ 1959 թ. Մատենադարանի պարսկերեն հրովարտակաների երկրորդ պրակը հրատարակության պատրաստած Հ. Փափազյանին: Նա այդ պրակում ընդգրկել էր այս եւ մի քանի այլ խնդիրների շուրջ հրովարտակի ձեռք բերման նպատակով Փիլիպոս կաթողիկոսի՝ շահին ներկայացրած խնդրագիրը, որի վերին հատվածում առկա՝ շահի հակիրճ հրամանով կարգադրվել էր բարձրացված հարցերի շուրջ տրված պատասխաններին համապատասխան վարվել⁵: Էջմիածնի արխիվի հիշյալ փաստաթուղթը ոչ միայն փաստում է այդ խնդրի կապակցությամբ առանձին հրովարտակ ձեռք բերված լինելու իրողությունը, այլևս ապացուցում կաթողիկոսական դիվանի անգամ ոչ նոտարական պատճենների իսկությունը եւ համապատասխանությունը բնօրինակներին:

Այս հրովարտակի բովանդակության հետ որոշ կապ ունի նաեւ շահ Աբաս Բ.-ի ժամանակագրորեն հաջորդ՝ 1654 թ. (1065 թ. սաֆար ամսի) հրովարտակը (հ. 392), որով հաստատվում է մուղնեցի քրիստոնյա Դավթի (Դավուդ) հաղղաբեն⁶ Կարպի գետից՝ նույն չափով, ինչպես որ նախկինում շահ Թահմասպ Ա.-ի հրովարտակով էր հատկացված եղել. շաբաթվա մեջ մեկ օր: Այս հրովարտակը թերեւս արտացոլում է Սիմեոն Երեւանցու «Ջամբուում» նշված իրողությունը հիշյալ ջրանցքի ջրօգտագործման կարգի վերաբերյալ, որի համաձայն՝ ջրի կեսը տրամադրվում էր Կարպիի շրջանի գյուղերին, որոնցից էր նաեւ Մուղնին, իսկ մյուս կեսը՝ գալիս հասնում էր Մայր Աթոռ Սուրբ Էջմիածին եւ հարակից գյուղը⁷:

Էջմիածնի արխիվի փաստաթղթերի մեջ կա Իրանի Սեֆյան հարստության վերջին շառավիղ Թահմասպ Բ.-ի անունից 1724 թ. երկու եւ 1732 թ. մարտին հրապարակված մեկ հրովարտակ: Վերջինս փախուստի դիմած լինելով Սպահանից՝ 1722 թ. նոյեմբերին իրեն շահ էր հռչակել, դրամ էր հատում եւ հրովարտակներ հրապարակում, թեեւ նրա իշխանության ներքո էին ընդամենը Թավրիզի ու Մազանդարանի որոշ շրջաններ⁸:

Չնայած Սեֆյան Թահմասպ Բ.-ի իշխանության թուլությանը՝ Ամենայն Հայոց կաթողիկոսները, այնուամենայնիվ, կարեւորում էին նրա հրապա-

⁵ Հ. Փափազյան, հրովարտակներ, պրակ Բ., վավ. 39:

⁶ Հաղղաբեն կամ հակկաբեն (حقاچه) — ջրի այն բաժինը, որ հատկացվում էր որոշակի անձանց հողամասի, հանդի, այգու եւ մշակելի որեւէ այլ տարածության ոռոգման համար:

⁷ ՍԻՄԵՈՆ ԵՐԵՎԱՆՑԻ, Ջամբու, աշխ.՝ Հ. Օհանյանի, Երեւան, 2022, էջ 231:

⁸ S. H. The Cambridge History of Iran, vol. 6 (The Timurid and Safavid Periods), edited by P. Jackson, Cambridge-London-New York-New Rochelle-Melbourne Sydney, Cambridge University Press, 1986, էջ 326:

րակած հրովարտականները եւ ջանում նրանից ձեռք բերել հայանպաստ փաստաթղթեր: Մատենադարանի պարսկերեն հրովարտականների երրորդ պրակում արդեն ընդգրկվել է Նոր Զուղայի հետ սերտ կապեր ունեցող Աստվածատուր կաթողիկոսի ձեռք բերած երկու հրովարտակ, որոնցից մեկը 1718 թ. վերահաստատում էր շահ Սուլթան Հուսեյնի 1710 թ. հրովարտակը կաթողիկական քարոզչությունը հայույթյան շրջանում սահմանափակելու մասին⁹, եւ մյուսը՝ 1724 թ. հրամանագիրը, որով մի շարք դատական ու վարչական ատյաններում իրենց իրավունքները հաստատելուց հետո միայն նոր մահմեդականացած հայերին թույլ էր տրվում հավակնել իրենց քրիստոնյա ազգականների ունեցվածքին¹⁰: Աբրահամ Երեւանցին 1724 թ. օսմանյան զորքերի՝ Երեւանի պաշարումն ու էջմիածին ժամանելը նկարագրելիս նշում է, որ այդ շրջանում Աստվածատուր կաթողիկոսը Թավրիզ էր գնացել՝ Թահմասպ Բ.-ին այցելության¹¹: Փաստորեն՝ այդ այցելության ժամանակ Աստվածատուր կաթողիկոսը ձեռք է բերել էջմիածնի արխիվի երկու հրովարտականները եւս, որոնք ուղղված են Մայր Աթոռի հարկային բեռի թեթեւացմանը. մեկն արգելում է մուսթաաշիրների¹² անօրինական պահանջները, մյուսը՝ մադադ-ե խարջ¹³ եւ չերիքի¹⁴ հարկերի գանձումը վանքից ու նրա միաբաններից¹⁵:

1724–1735 թթ. Երեւանի նահանգի (Զոխուր Սաադի վիլայեթ) մեծ մասը փաստացի գտնվում էր Օսմանյան կայսրության տիրապետության

⁹ Մատենադարան (ՄՄ), կաթողիկոսական դիվան (կ/դ), թղթ. 1գ, վավ. 272:

¹⁰ Ք. ԿՈՍՏԻԿՅԱՆ, Մատենադարանի պարսկերեն վավերագրերը, հրովարտականներ, պրակ Գ., Երեւան, 2005, վավ. 86:

¹¹ ԱՐՐԱՀԱՄ ԵՐԵՒԱՆՑԻ, Պատմութիւն պատերազմացն 1721–1736 թ. Յերեւան, 1938, էջ 14:

¹² Մուսթաաշիր (مستاجر) – գյուղերից ու այլ հարկատուներից գանձվող հարկերը հաճախ վարձակալության էին տրվում, որոնց վարձակալողները կոչվում էին մուսթաաշիրներ:

¹³ Մադադ-ե խարջ (مدد خرج) – բառացի թարգմանվում է որպես ծախսերի համար նպաստ: Հարկային առանձնաշնորհման մի տարբերակ է, որ տրվում էր որոշ պաշտոնյաների: Այն գանձվում էր դեռեւս Սեֆյան ժամանակաշրջանում (տե՛ս Tadhkirat al-mulūk, A manual of Safavid administration (circa 1137/1725), Persian text in Facsimile, translated and explained by V. Minorsky, London, printed by W. Heffer and sons LTD., 1943, էջ 109, 183), բայց առավել հաճախ այդ հարկի մասին աղբյուրներում հիշատակություն կա Սեֆյան պետության անկմանը հաջորդած՝ մինչեւ ԺԸ. դարի վերջ ընկած ժամանակահատվածում:

¹⁴ Չերիք կամ չերիքի ոսկի – «գար-ե չերիքի»: Սա այն տուրքն էր, որ գանձվում էր ռայաթներից այն դեպքում, երբ քոչվորներից աշխարհագոր կամ «չերիք» էր հավաքվում: Վաղ Սեֆյան շրջանում այն հատուցվում էր ոսկով (Չ. ՓԱՓԱՋՅԱՆ, Մատենադարանի պարսկերեն վավերագրերը, հրովարտականներ, պրակ Լ, Երեւան, 1956, էջ 117–118):

¹⁵ Մայր Աթոռ Սբ. էջմիածին, արխիվ, վավ. 391 եւ 394:

տակ, որի ընթացքում 1730 թ. դեկտեմբերին Թահմասպ Բ.-ն ռազմարշավ է ձեռնարկում դեպի այնտեղ, որը շարունակվում է մինչև հաջորդ տարվա գարունը: Շահական զորքերը մոտենում են Երեւանի բերդին եւ 18 օր կանգ առնում նրա շրջակայքում, թեեւ չեն կարողանում գրավել այն՝ հարկադրված լինելով շուտով նահանջել¹⁶: Այս ընթացքում Աբրահամ Բ. Խոշաբեցի կաթողիկոսին¹⁷ հաջողվում է ստանալ ոչ միայն իր կաթողիկոսական իրավունքները հաստատող, այլեւ երկու այլ՝ հայերի համար օգտակար փաստաթուղթ, որոնք ուսումնասիրվել եւ հրատարակվել են¹⁸: Էջմիածնի արխիվում պահվում է Թահմասպ Բ.-ի եւս մեկ՝ 1731 թ. վերաբերող հրովարտակ, որում, վկայակոչելով նախկին շահերի բարեհաճությունը վանքի նկատմամբ եւ բազում շնորհները, Թահմասպ Բ.-ն հայցում էր կաթողիկոսի ու վանականների օրհնությունն իր ռազմարշավը Երեւանի նահանգում հաջողությամբ ավարտելու համար, որից հետո իր այցելությանը պետք է պատվեր նաեւ Մայր Աթոռը եւ նրա հոգեւորականներին (հ. 393):

Մայր Աթոռ Ս. Էջմիածնի արխիվի հրովարտականների շարքում հատուկ տեղ է զբաղեցնում Երեւանի Հուսեյն Ալի խանի 1760 թ. հրամանագիրը Հայոց Եկեղեցու, նրա հոգեւոր առաջնորդների ու հայ ժողովրդի իրավունքների վերաբերյալ (հ. 389): Այդ փաստաթղթով ամրագրվում էին Սեֆյան շահերի եւ ապա նաեւ Նադիր շահի՝ Հայոց Եկեղեցուն ու կաթողիկոսներին, նաեւ հայ ժողովրդին տված իրավունքները Կովկասում ձեւավորված իրանական տիպի պետականության առանձնահատկությունները կրող կիսանկախ Երեւանի խանությունում: Փաստաթղթի խնդրագրի հատվածում թվարկվում եւ մատնանշվում են այդ իրավունքները 13 կետով եւ ապա վավերացվում կցված խանական հրամանագրով: Փաստաթուղթն ստեղծվել է Ամենայն Հայոց Կաթողիկոս Հակոբ Շամախեցու նախաձեռնությամբ եւ նրա ներկայացրած խնդրագրի հիման վրա: Խնդրագրում նշվում են Մայր Աթոռի տնտեսական իրավունքներն իր կալվածքների ու սեփականության նկատմամբ, որոշակի հարկերից ու տուրքերից ազատված լինելը, կաթողիկոսի ինքնուրույնությունն

¹⁶ Sêu MÎRZÂ MAHDÎ KHÂN ASTARÂBÂDÎ, Târikh-i Jahāngushā-yi Nādirî, Tihran, Anjoman-i Asar va mafâkher-i farhangi, 1277, էջ 169–171:

¹⁷ Աբրահամ Բ. Խոշաբեցին Ամենայն Հայոց կաթողիկոս է եղել 1730–1734 թթ.:

¹⁸ Այս մասին տես Ք. ԿՈՍՏԻԿՅԱՆ, Թահմասպ Բ.-ի հայերին ուղղված հրովարտականները եւ 1730–31 թթ. նրա արշավանքը դեպի Երեւան, «Մերձավոր եւ Միջին Արեւելքի երկրներ եւ ժողովուրդներ», XXIII, Երեւան, 2004, էջ 356–371, նաեւ՝ Ք. ԿՈՍՏԻԿՅԱՆ, հրովարտականներ, պրակ Գ., վավ. 88–90, էջ 25–26:

իր ենթակաների եւ բարձրաստիճան հոգեւորականների նշանակման ու պաշտոնից ազատման հարցերում, նաեւ նրա բացառիկ իրավունքը հայուիթյան ներհամայնքային խնդիրները կարգավորելու եւ կրոնական օրենքները գործադրելու հարցում, Մայր Աթոռի սպասավորների եւ ուխտավորների՝ առանց մաքսատուրքերի երթեւեկուիթյան իրավունքները: Միաժամանակ արգելվում էին ամեն տեսակի ոտնձգուիթյունները վանական կալվածքների նկատմամբ, Մայր Աթոռին ներկայացվող անհիմն ու անօրինական պահանջները, հայերի՝ մահմեդականուիթյուն ընդունելու պարտադրանքը եւ կրոնական արարողուիթյունների անցկացմանը որեւէ կերպ խոչընդոտելը:

Երեք տարի անց Սիմեոն Երեւանցի կաթողիկոսի ջանքերով իր կաթողիկոսական իրավունքները հաստատող Քերիմ խան Զենդի հրովարտակով վերահաստատվում են նաեւ Հայոց Եկեղեցու եւ հայուիթյան վերահիշյալ իրավունքները¹⁹, որոնցում միայն մեկ կետ է ավելացվում Հայոց Եկեղեցու ապահարկուիթյունը հաստատելու, նաեւ մի քանի այլ արտակարգ հարկերից ազատելու վերաբերյալ:

Հետագայում այս փաստաթղթերը հիմք են դառնում Ամենայն Հայոց կաթողիկոսի դիրքի եւ իրավունքների մեկ առ մեկ հստակ ձեւակերպումներով Ֆաթհալի շահի եւ Ատրպատականի փոխարքա թագաժառանգ Աբաս Միրզայի՝ Դավիթ եւ Եփրեմ կաթողիկոսներին տված հրովարտական հրապարակման համար²⁰:

Բացի վերը նշված հրովարտականներից՝ Մայր Աթոռ Սբ. Էջմիածնի արխիվի փաստաթղթերի մեջ առկա են նաեւ Սեֆյան եւ հետագա շրջանի շարիաթական-նոտարական փաստաթղթեր:

Այս փաստաթղթերից չորսը վերաբերում են Դարաշամբի Ս. Ստեփանոս Նախավկայի վանքին: Այս առթիվ հարկ է հիշել, որ Մատենադարանի կաթողիկոսական դիվանում է պահվում նաեւ այս վանքի արխիվը, որում կա պարսկերեն 50-ից ավելի փաստաթուղթ՝ այդ թվում նաեւ հնագույն՝ 1330/1 թթ. Աբու Սաիդ Իլխանի հրովարտականները՝ տրված այս վանքին²¹:

¹⁹ Այդ հրովարտակի պատճենն է պահպանվել, տե՛ս Ք. ԿՈՍՏԻԿՅԱՆ, Մատենադարանի պարսկերեն հրովարտականները, պրակ IV, Երեւան, 2008, վավ. 49:

²⁰ Ք. ԿՈՍՏԻԿՅԱՆ, Մատենադարանի պարսկերեն հրովարտականները, պրակ V, Երեւան, 2021, վավ. 8, 13, 31:

²¹ Հ. ՓԱՓԱԶՅԱՆ, Երկու նորահայտ իլխանական յաուլիդներ, Բանբեր Մատենադարանի, հտ. 6, 1962, էջ 379–401:

1820–40 թթ. Ս. Ստեփանոսի վանահայրն էր Սարգիս Դավթյանը²²։ Ինչպես հայտնի է դառնում Մատենադարանի որոշ պարսկերեն վավերագրերի բովանդակությունից, Ս. Ստեփանոս Նախավկայի վանքի առաջնորդ Սարգիս եպիսկոպոսը, ելնելով ժամանակի պահանջներից ու իր վանքի շահերից, համագործակցում էր իրանական իշխանությունների հետ՝ տեղեկություններ հաղորդելով ռուս-իրանական 1826–1828 թթ. պատերազմի ընթացքում ռուսական զորքերի գործողությունների մասին²³։ Իրանական կողմը, բարձր գնահատելով Մաղարդավանքի վանահոր ծառայություններն ու նվիրվածությունը Իրանին, պաշտպանում էր վանքի շահերն ամեն տեսակի ոտնձգություններից ու օժանդակում նրա բարօրրությանը։

1828 թ.՝ Թուրքմենչայի հաշտության պայմանագրի կնքումից հետո, կազմակերպվում է իրանահայության ներգաղթը Ռուսաստանի տիրապետության տակ անցած հայկական շրջաններ, եւ շուրջ 45 հազար հայ հեռանում է Իրանից, որի հետեւանքով հայաթափվում է հիմնականում Ատրպատականի նահանգը։ Արդյունքում այնտեղի հայոց վանքերը զրկվում են իրենց թեմական բնակիչներից ու համայնքներից եւ կանգնում կործանման եզրին։

Այս պայմաններում Աբաս Միրզան հատուկ հոգածություն է հանդես բերում Դարաշամբի Ս. Ստեփանոս Նախավկայի վանքի նկատմամբ, որը եւս ծանր վիճակում էր Ատրպատականի հայության արտագաղթից հետո։

1829 թ. թագաժառանգ Աբաս Միրզայի եւ նրա որդի Բահրամ Միրզայի (որը Խոյի կառավարիչն էր 1828–1829 թթ.)²⁴ հրամանագրերով Ս. Ստեփանոս Նախավկայի վանքին որպես թիուլ հատկացվում է Դարաշամբ գյուղը²⁵, որն այնուհետեւ դառնում է վանքի վակֆային կալվածքը։

Գյուղի վերաձեւակերպումը, որպես վակֆային կալվածք, իրավական բարդ գործարք էր, որը կարող էր կատարվել կալվածքի գնումից հետո։ Այս գործընթացի մասն են կազմել, թերեւս, Մայր Աթոռ Ս. Էջմիածնի արխիվի պարսկերեն երեք փաստաթղթերը, որ վերաբերում են Սբ.

²² Հ. ՈՍԿԵԱՆ, Վասպուրական-Վանի վանքերը, Բ. Մաս, Վիեննա, 1942, էջ 564։

²³ ՄՄ, կ/դ, թղթ. 1ե, վավ. 750, 751, 752։

²⁴ Saku A. NAVA'I, Bahrām Mīrzā, Mo'ezz - Al -Dawla, Encyclopaedia Iranica, V ol. III, Fasc. 5, էջ 524, available online at <http://www.iranicaonline.org/articles/bahram-mirza-moez-z-al-dawla-the-secondson-of-the-crown-prince-abbas-mirza>։

²⁵ ՄՄ, կ/դ, թղթ. 1ե, վավ. 678, 754, տե՛ս Ք. ԿՈՍՏԻԿՅԱՆ, հրովարտական, պրակ V, վավ. 94, 95։

Ստեփանոս Նախավկայի վանքին: Դրանք կալվածագրեր են, որոնցով մաս-մաս գնվել է Դարաշամբ գյուղը: Նախիջեանի էհսան խանի հաստատմամբ կնքված այս բարդ գործարքով հայ վաճառականներ խոշաղազարի եւ խոշա Պետրոսի անվամբ ձեւակերպվել է գնում այդ գյուղի սեփականատեր Ֆաթհալի խան Քենգեռլուի ժառանգ Մոհիբ Ալիից, ապա հայ վաճառականներն իրենց գնած կալվածքները վաճառել են վանքի Սարգիս եպիսկոպոսին²⁶: Ինչպես նշվում է Մաղարդավանքի գլխավոր եկեղեցու շքամուտքի կամարակապ ճակատակալ քարի պարսկերեն արձանագրության մեջ, այդ գյուղի գնման համար վճարվել է ընդամենը 300 թուման, որից հետո այն ձեւակերպվել է նաեւ որպես վանքապատկան վակֆ²⁷: Թերեւս այդ արձանագրության բնագիրն է, որոշ տարբերություններով եւ հինգ վկաների հաստատմամբ, ներկայացված Մայր Աթոռի արխիվի պարսկերեն վավերագրերի շարքում՝ որպես համար 395:

Հարկ է նշել, որ ինչպես փաստում են Մատենադարանի կաթողիկոսական դիվանի մի քանի փաստաթղթեր, այդ գյուղի նկատմամբ հավանություններ են ունեցել նաեւ այլ անձինք. մասնավորապես կազմվել է համախոսական գրություն, որով 17 անձանց վկայությամբ հաստատվել է այդ կալվածքի վաճառված լինելը Մոհիբ Ալիի կողմից վանքի Սարգիս վանահորը, այլ ոչ Վարմազիարցի ոմն Մուհամմադ Հուսեյն Բեկին²⁸: Մեկ այլ փաստաթուղթ էլ կազմվել է որպես տեղեկանք այն մասին, որ Դարաշամբի մի կեսը 150 թումանով գնելուց հետո Սարգիս վանահայրը գնում է նաեւ մյուս կեսը՝ 160 թումանով²⁹, որից հետո այն ձեւակերպվել է որպես վանքին արված նվիրատվություն (հոբբե):

Հետագայում եւս այս գյուղի պատկանելությունը վանքին հաստատվել է թե՛ տեղական իշխանությունների եւ թե՛ Ղաջար Նասրեդդին շահի հրամանագրերով³⁰: Ինչպես փաստում են նաեւ հայկական աղբյուրները, Դարաշամբ գյուղն այնուհետեւ՝ ողջ ԺԹ. դարի ընթացքում, շարունակում էր պատկանել վանքին³¹: ԺԹ. դարի մի շարք հրովարտական արգելում

²⁶ Տե՛ս ստորեւ ներկայացված հ. 396 եւ 397 փաստաթղթերի նկարագրությունները:

²⁷ Ա. ՀԱԽՆԱԶԱՐՅԱՆ, Արտազի երեք վանքերը, Երեւան, 2012, էջ 308:

²⁸ ՄՄ, կ/դ, թղթ. 1ե, վավ. 764:

²⁹ ՄՄ, կ/դ, թղթ. 1ե, վավ. 765:

³⁰ ՄՄ, կ/դ, թղթ. 1ե, վավ. 762, 678, 776, 792, 794բ, 797, նաեւ՝ Ազգային արխիվ, ֆոնդ 57, ցուցակ 1, գործ 285:

³¹ Ա. ՀԱԽՆԱԶԱՐՅԱՆ, նշ. աշխ., էջ 224:

են հարեւան մահմեդականներին՝ մասնավորապես վարմազիարցիներին, ոտնձգություններ կատարել վանքի կալվածքների ու նրա եկամուտների նկատմամբ³²։ Վերոհիշյալ ցեղի ոտնձգություններից վանքի պաշտպանության հարցերին է վերաբերում նաեւ Մայր Աթոռ Ս. Էջմիածնի արխիվի մի անթվակիր նամակ՝ գրված (ըստ կնիքի) Աղալար Գորշիից Խոյի բեկլարբեկ Նաջաֆդուլիին, այնտեղի վանահայր Հովհաննեսի բարձրաձայնած այդ խնդրի կապակցությամբ (հ. 91)։ Հ. Ոսկյանը նշում է, որ Ս. Ստեփանոս Նախվկայի Սարգիս վանահորը հաջորդում են Հովհաննես Գալստյանը եւ Հովհաննես Ավետյանը, որոնցից հետո 1864 թ. վանահայր էր Մեսրոպ Սմբատյանը³³, ուստի այս նամակը հավանաբար գրվել է 1840–1864 թվականների միջեւ ընկած ժամանակահատվածում։ Դարաշամբ գյուղն Ատրպատականի այն եզակի գյուղերից էր, որ հայաբնակ է մնում մինչեւ Ի. դարի կեսերը, եւ այս ընթացքում այնտեղ ժամանակ առ ժամանակ ապաստան էին գտնում տարածաշրջանում բախումների միջոցին այլ վայրերից գաղթած հայեր³⁴։

Մայր Աթոռ Սբ. Էջմիածնի արխիվի պարսկերեն վավերագրերից մի քանիսն էլ վերաբերում են Մայր Աթոռի կալվածքներին ու խնդիրներին։ Մեզ հայտնի՝ պարսկերեն 17 վավերագրերի նկարագրությունների ցանկը ներկայացված է սույն հոդվածի հավելվածում։

Այսպիսով՝ կարելի է եզրակացնել, որ Մայր Աթոռ Սբ. Էջմիածնի արխիվի վերոհիշյալ վավերագրերը, ըստ երեւույթին, ժամանակին կաթողիկոսական դիվանի մաս են կազմել, բայց այդ հավաքածուի հետ չեն պետականացվել եւ այնուհետեւ նրա հետ չեն բերվել Մատենադարան։ Նրանց մեջ կան պատմական արժեքավոր փաստաթղթեր, որոնք լրացնում են Մատենադարանի արխիվի պարսկերեն վավերագրերի տեղեկություններն ու տվյալները եւ հանդիսանում հայոց պատմության արժեքավոր սկզբնաղբյուրներ։ Այս հանգամանքով պայմանավորված՝ հոդվածին կցում ենք վերոհիշյալ վավերագրերի նկարագրությունները, որոնք հնարավորություն կտան հետազոտողներին անհրաժեշտության դեպքում փաստաթղթերում առկա տվյալներն օգտագործելու իրենց գիտական աշխատանքներում, քանի որ մինչ այժմ դրանք նկարագրված չեն եղել եւ անհայտ են մնացել գիտական շրջանակներին։

³² ՄՄ, Կ/դ, թղթ. 1ե, վավ. 753, 763, 775, 776։

³³ Հ. Ոսկյան, նշ. աշխ., էջ 564։

³⁴ Ա. Հաննաքանյան, նշ. աշխ., էջ 224։

ՀԱՎԵԼՎԱԾ

Վավերագրերի նկարագրություններ.

1. Հ. 389, բնագիր, մեծ. 47,5 x 67 սմ, գիր՝ նասթա՛լիդ՝ շիֆասթեի տարրերով: Երեսանի Հուսեյն Ալի խանի հիշրայի 1173 թ. շա՛բան ամսի 4 (1760 թ. մարտի 10) հրովարտակը՝ հրապարակված Հակոբ Շամախեցի կաթողիկոսի ներկայացրած խնդրագրի հիման վրա՝ Հայոց Եկեղեցու ու Էջմիածնի Մայր Աթոռի նշված 13 կետերով շարադրված իրավունքները հաստատելու վերաբերյալ:

2. Հ. 390, բնագիր, մեծ. 28 x 59,5 սմ, գիր՝ նասթա՛լիդ շիֆասթեի տարրերով: Շահ Աբաս Բ.-ի հիշրայի 1060 թ. ոաբի՛ Ա. ամսի (1650 թ. մարտի 4– ապրիլի 3) հրովարտակը Փիլիպոսը կաթողիկոսի խնդրանքով, որտեղ նշվում է, որ կաթողիկոսը, զգալի ծախս կատարելով, Կարսի կողմերից ջրանցք է կառուցել, այնտեղից 7–8 ջրաղաց աշխատեցնող ջուր բերել: Ուստի Վաղարշապատ գյուղի մանալը, որը նախկինում որպես համեսալե տրամադրվում էր Երեսանի բեկլարբեկին, այսուհետև պետք է վանքի միաբաններին հանձնվի: Նշվում է, որ կաթողիկոսի խնդրանքին իր գրավոր համաձայնությունն է տվել նաև Երեսանի բեկլարբեկ Քեյխոսրով խանը:

3. Հ. 391, բնագիր, մեծ. 23 x 58 սմ, գիր՝ նասթա՛լիդ՝ շիֆասթեի տարրերով: Շահ Թահմասպ Բ.-ի 1136 թ. ջումադի Ա. ամսի (1724 թ. հունվարի 27 – փետրվարի 26) հրովարտակն է՝ ուղղված Երեսանի բեկլարբեկին, որով կարգադրվում է մալոջահաթը վճարող Էջմիածնի Աստվածատուր կաթողիկոսին ու միաբաններին չերիֆի, մադադ-ե խարջի եւ այլ պահանջներով շանհանգստացնել:

4. Հ. 392, բնագիր, մեծ. 25 x 45,5 սմ, գիր՝ նասթա՛լիդ՝ շիֆասթեի տարրերով, վնասված, պատռվածքներով: Շահ Աբաս Բ.-ի հիշրայի 1065 թ. սաֆար ամսի (1654 թ. դեկտեմբերի 11 – 1655 թ. հունվարի 9) հրովարտակը մոլոնեցի Բրիստոնյա Դավոդի հաղղաբեն Կարպի գետից մրա տնօրինմանը հանձնված լինելու հաստատմամբ:

5. Հ. 393, բնագիր, մեծ. 23 x 45 սմ, գիր՝ նասթա՛լիդ՝ շիֆասթեի տարրերով: Շահ Թահմասպ Բ.-ի հիշրայի 1143 թ. շավալ ամսի (1731 թ. ապրիլի 9 – մայիսի 8) հրամանագիրն Էջմիածնի կաթողիկոսին եւ միաբաններին, այն մասին, որ քանի որ իր նախնիները մշտապես նվերներ են ուղարկել վանքին եւ Հիսուս մարգարեի օրհնությունն ստացել, այժմ էլ, որ նա եկել է Չոխուր

Սաադի վիլայեթ (Երեւանի նահանգ), բայց պատերազմական թոհուրոհի մեջ է, եւ այցելության պատեն պահը չէ, ուստի կաթողիկոսը եւ բոլոր հոգեւորականները պետք է Հիսուս եւ Մուսա մարգարեների օգնությունը հայցեն, որ պեսգի դրանից հետո Ալլահի կամով այդ [Նորին Մեծության այցելության] պատվին արժանանան:

6. Հ. 394, բնագիր, մեծ. 23 X 43,5 սմ, գիր՝ նասթա՛լիղ շիֆասթեի տարերով: Շահ Թահմասպ Բ.-ի հիշրայի 1136 թ. շումադի Ա. ամսի (1724 թ. հունվարի 27 – փետրվարի 26) հրովարտական էջմիածնի Աստվածատուր կաթողիկոսին մուսթա՛աջիրների ու զաբիթների³⁵ անօրինական պահանջները վանքի միաբաններից իրենց հողերը մշակելու համար արգելելու մասին:

7. Հ. 395, բնագիր, մեծ. 22,5 X 35 սմ, գիր՝ նասթա՛լիղ շիֆասթեի տարերով: Սբ. Ստեփանոս Նախավկայի դարբասին ամրացված մարմարի վրայի արձանագրության պատճենը, որի համապատասխանությունը բնագրին հաստատված է 5 անձանց կնիքներով: Նշվում է, որ Ֆաթհալի շահի օրոք Աբաս Միրզայի ողորմածությամբ Դարաշամբ որպես թիուլ հատկացվեց Դանիելի վանքի վանահայր Ստեփան Զուլայեցու որդի Սարգիս վանահորը, նա էլ գնեց այն հանգուցյալ Ֆաթհալի Բեկի որդի Մոհիբ Ալի Բեկից 300 թումանով եւ վակֆ արեց վանքին, որպեսզի իրենից հետո մյուս վանահայրերը նրա եկամուտները ծախսեն վանքի համար: Որպես թիուլ նվիրված լինելու թվական նշվում է հիշրայի 1240 թ. (1824/5 թ.), իսկ գնման եւ վակֆ արվելու թվական՝ հիշրայի 1246 թ. (1830/1):

8. Հ. 396, բնագիր, մեծ. 33 X 100 սմ, գիր՝ նասթա՛լիղ շիֆասթեի տարերով: Կալվածագիր՝ գրված հիշրայի 1244 թ. զի հեջջե ամսի 1-ին (1829 թ. հունիսի 4 – հուլիսի 3), որով Ֆաթհալի Խան Քենգեղուտի տոհմից Մոհիբ Ալին վանառում է Ս. Դանիելի վանքի Սարգիս վանահոր որդի Ղազարին Դարաշամբի կեսը (բացի 4 ֆար ջրաղացից եւ մի ֆանի կտոր այգուց) 100 Թավրիզի թուման գումարով եւ 30 թումանով էլ մուսալենե է կնքում (ընդհանուր 130 թուման): Վավերագրի վերին ճակատային մասում գրված է, որ Մոհիբ Ալին, նույն տարվա զի հեջջե ամսի 1-ին այդ կալվածքը վաճառած լինելով հոջա Սարգսի որդի հոջա Ղազարին, հաջորդ օրը՝ զի հեջջեի

³⁵ *Զաբիթ* (ضابط) – գրավող, բռնագրավող: Ժէ.-ԺԸ. դարերում զաբիթ էին կոչվում նաեւ պետական հարկերի վարձակալները, որոնք, նախապես որոշ գումար մուծելով պետական գանձարանը, իրավունք էին ստանում տվյալ հարկատուի հարկերը գանձելու (Հ. ՓԱՓԱՋՅԱՆ, *հրովարտական, պրակ Բ.*, էջ 215):

երկուսին, հոջա Ղազարը այն նույն գումարով վանառում է նույն վանքի վանահայր Սարգսին:

9. Հ. 397, բնագիր, մեծ. 33 x 100 սմ, գիր՝ նասթա՛լիդ շիֆասթեի տարրերով: Կալվածագիր գրված հիջրայի 1244 թ. զի հեջջե ամսի 1-ին (1829 թ. հունիսի 4), որի համաձայն՝ Դանիելի վանքի Սարգիս վանահայրը վանառում է Դարաշամբի կեսը (բացի 4 ֆար ջրաղացից եւ մի ֆանի կտոր այգուց) Գասպարի որդի հոջա Պետրոսին 100 թուման Թավրիզի դիալ 1000 փանահաբադի դիմար եւ բաշաղլու 8000 դիմարով, նաեւ մուսալեհե է կնքում 30 թումանով (ընդհանուր 130 թուման): Փաստաթղթի վերին նակատային հատվածում գրությամբ նշվում է, որ գործարքի հաջորդ օրը զի հեջջեի 2-ին (հունիսի 5) Սարգիս վանահայրը նույն գումարով այդ նույն վանառված մասը հետ է գնում հոջա Պետրոսից: Փաստաթղթի վավերականությունը հաստատված է նախորդ գրությունից ավելի վեր՝ դրված գնդապետ (պոլկովնիկ) Նախիջեւանի էհսան հան Քենգեղուրի կնքադրոշմով:

10. Հ. 398, բնագիր, մեծ. 33 x 83 սմ, գիր՝ նասթա՛լիդ շիֆասթեի տարրերով: Կալվածագիր գրված հիջրայի 1244 թ. զի դաադե ամսին (1829 թ. մայիսի 5 – հունիսի 4), որով Ֆաթհալի Բեկ Քենգեղուրի ժառանգ Մոհիբ Ալի Բեկը վանառում է Դիբֆենդի եւ Օրթաֆենդի, որ կոչվում է Դարաշամբ, 10,5-ը (یک عشر و نیم) Դանիելի վանքի վանահայր Սարգիս խալիֆայի 260 Թավրիզի թումանով: Փաստաթուղթը հաստատված է 30-ից ավելի վկաների կնիքներով:

11. Հ. 452, բնագիր, մեծ. 30 x 89 սմ, իրար միացված երկու փաստաթուղթ, գիր՝ նասթա՛լիդ շիֆասթեի տարրերով: Հակոբ Զուղայեցի կաթողիկոսի խնդրագիրը վանքի հետեւյալ հարցերի շուրջ եւ համապատասխան երեւանի Աբաս Ղուլի բեկլարբեկի հրահանգները.

Ա. հայցում է բեկլարբեկի օժանդակությունը Մայր Աթոռի բարեկարգմանը, որը կնպաստի այնտեղի միաբանների ավելացմանը,

Բ. ֆանի որ հնագույն ժամանակներից վանքի տնտեսության անասունները, արոտավայրի համար հարմար տեղ չունենալով, օգտվում էին մոտակայքում գտնվող Բաթոննջ գյուղի արոտավայրերից, որոշ ժամանակ առաջ այնտեղ հաստատվել էր ֆյուրաֆանլու ցեղը եւ հարեւան հայկական գյուղերին անհամգատություն էր պատճառում, ուստի բարձրագույն ատյանին դիմելով՝ հրովարտակ է ձեռք բերում՝ ուղղված Մուհամմադ Ղուլի բեկլարբեկին՝ նրանց այնտեղից վտարելու վերաբերյալ եւ դա իրականացնելով՝ իր մարդկանց էր ուղարկել ու շենացրել այն եւ օգտագործում էր վանքի կեն-

դանիների կերակրման համար, իսկ դրա հարկերը մաղթա³⁶ էր արել, ուստի խնդրում է վերահաստատել այդ իրավունքը: Ստորին մասում արված մակագրությամբ նշված է, որ մաղթա է արված եղել տարեկան 7 թումանով:

Գ. Բանի որ ձմռան սաստիկ ցրտերի ժամանակ էջմիածին մտնող գետերը սառցակալում են, եւ ջուր չի հասնում, 400 թուման ծախսելով՝ ստորգետնյա ջրանցքներ է կառուցել, ուստի խնդրում է, որ թույլ տրվի այդ ջրանցքներով հասցվող ջրի ավելցուկն օգտագործել վանքի անմշակ հողերը մշակելու եւ դրանց մալիքեն օգտագործելու այդ ջրանցքները նորոգելու եւ սարքին պահելու վրա, նաեւ ցանկանում է բաղնիք կառուցել եւ հուսով է, որ իր խնդրանքը ողորմածության կարժանանա: Ստորին մասում մակագրություն կա, ըստ որի՝ Բյարիզի ավելցուկ ջրով հողամշակության համար որեւէ մալիքե³⁷ նշանակված չէ, եւ ինչպես որ կկարգադրվի, այնպես կարվի (հմմտ. Կաթողիկոսական դիվան, թղթ. 1է, վավ. 1079-ի հետ):

12. Հ. 453, բնագիր, մեծ. 24,5 x 40,5 սմ, նորոգված, վնասված: Շարիաթական փաստաթուղթ՝ գրված հիջրայի 1084 թ. մուհարրամ ամսի 20-ին (1673 թ. մայիսի 7), ըստ որի՝ Հակոբ Զուղայեցի կաթողիկոսն իր սեփականությունից 14 թուման վնարում է էջմիածնի վակֆային մուլքերի համար՝ որպես իխրաշաթ³⁸, եւ դրա դիմաց երկու տարով վարձակալում Աշտարակում գտնվող մի այգի, որից հետո այդ այգին նրա մեջ մտնող ամեն ինչով վակֆ է անում Սաղմոսավանքին՝ հանձնելով այն Գաբրիել վարդապետի տնօրինմանը: Լուսանցում հաստատված է Հակոբ կաթողիկոսի եւ հետագա եղիազար, Նահապետ եւ Աբրահամ կաթողիկոսների կողմից:

13. Հ. 454, բնագիր, մեծ. 31,5 x 44 սմ, գիր՝ շիֆասթե, խառը Կալվածագիր՝ գրված հիջրայի 1241 թ. մուհարրամ ամսի 1-ին (1825 թ. օգոստոսի 16), որով էջմիածնեցի Սարգսի որդի Հարությունը (Արիթուն) Երանոսի որդի Սարգսի լիազորագրով վանառեց էջմիածնում գտնվող մեկ կտոր այգին վան-

³⁶ Մաղթա (مقسط) – կտրված, որոշված, վերջնական: Մթերքի որոշակի քանակ կամ հաստատուն գումար, որ ամեն տարի պարբերաբար կերպով, անկախ հարկատուի տվյալ տարվա բերքից, պետք է հատուցվեր կալվածատիրոջը կամ պետությանը՝ որպես հարկ (Հ. ՓԱՓԱՋՅԱՆ, հրովարտականեր, պրակ Ա., էջ 113):

³⁷ Մալիե (مالیه) – ժե. դարից եւ ավելի վաղ ժամանակներից գոյություն ունեցող գլխավոր եկամտահարկի «մալի» տարբերակներից, որ ավելի գործածական դարձավ ԺԸ. դարում եւ փոխարինում էր «մալին» կամ «մալոջհաթին» (Հ. ՓԱՓԱՋՅԱՆ, հրովարտականեր, պրակ Բ., էջ 222):

³⁸ Իխրաշաթ (اخراجات) – բառացի նշանակում է «ծախսեր»: Այդպես էին կոչվում այն արտակարգ ծախսերը, որ տարբեր առիթներով ռայաթները պարտավոր էին հատուցել պետությանը կամ նրա պաշտոնյաներին (Հ. ՓԱՓԱՋՅԱՆ, հրովարտականեր, պրակ Ա., էջ 110):

ֆի լուսարար Օվանեսին՝ 100 երեւանի թուման գումարով, նաեւ մեկ փանահաբաղի դինար գումարով էլ մուսալեհե կնքեց:

14. Հ. 455, բնագիր, մեծ. 27,5 x 20 սմ, գիր՝ նասթա'լիղ շիֆասթեի տարրերով: Շարիաթական փաստաթուղթ՝ գրված հիջրայի 1164 թ. (1750/1 թ.) Փիւրի Դարվիշի պատկանելության հարցի շուրջ տեղի ունեցած վեճի կապակցությամբ: Էջմիածինը որոշակի գումար է վճարում պահանջատերերին, որը բաժանվում է նրանց միջեւ, եւ մուսալեհե է կնքվում, որ նրանք հրաժարվում են իրենց պահանջներից:

15. Հ. 91, բնագիր, մեծ. 21,5 x 33 սմ, գիր՝ խառը: Նամակ (ըստ կնիքի) Աղալար Գորշից սարհարի ծառա հոյի բեկլարբեկ Նաջաֆդուլիին, Դանիելի վանքի վանահայր Հովհաննեսի խնդրի շուրջ (ԺԹ. դարի կէ՛ս): Նշվում է, որ վարմագիւրցիները նրա մուլերից եւ եկամուտներից յուրացնում են եւ վնասում նրան, այդ պատճառով անհրաժեշտ եղավ այդ մասին գեկուցել եւ հրամանագիր խնդրել, որպեսզի կարգադրվի վարմագիւրցիներից մի քանի գեղջավազների եւ գյուղացիների կողմից պարտավորագիր տալ, որպեսզի այն, ինչ անցյալ եւ նախանցյալ տարիներից մնացել է, հարկահավաքների միջոցով վանքին վերադարձնեն եւ այլեւս վնաս չհասցնեն:

16. Հ. 459, բնագիր, մեծ. 34 x 130 սմ, գիր՝ նասխա, նասթա'լիղ շիֆասթեի տարրերով: Խոջա Սեթի որդի Խոջա Հակոբի հիջրայի 1069 թ. ռաբի Ա. ամսի (1658 թ. նոյեմբերի 27 – դեկտեմբերի 27) վակֆնամեն, որով վակֆ է անում Երեւանի Նորագեղը ամբողջությամբ, Եղվարդի 4,5 դանգը իրենց մեջ մտնող ամեն ինչով, Երեւանում գտնվող մեկ դուռ այգին, Դարաֆենդում գտնվող մեկ դուռ այգին եւ մեկ դուռ ջրաղացը Էջմիածնի վանքին՝ հանձնելով այն Հակոբ կաթողիկոսի տնօրինմանը: Ստորագրված ու հաստատված է Աղվանից Սիմեոն կաթողիկոսի եւ 20-ից ավելի անձանց անուններով ու կնիքներով: Նույնաբովանդակ վակֆնամե կա նաեւ Մատենադարանի կաթողիկոսական դիվանում (կ/դ. թղթ. 1բ, վավ. 108), որը հրատարակվել է³⁹:

17. Հ. 456, պատճեն, մեծ. 38 x 54 սմ, գիր՝ նասթա'լիղ շիֆասթեի տարրերով: Ֆաթհալի շահի Դավիթ կաթողիկոսի անունով հիջրայի 1219 թ. ջումադի Բ. ամսի (1804 թ. օգոստոսի 8 – սեպտեմբերի 9) հրովարտակն Էջմիածնի եւ հայ հոգեւորականների իրավունքների հաստատմամբ⁴⁰:

³⁹ Ք. ԿՈՍՏԻԿՅԱՆ, Մ. ԽԵՉՈ, *Մատենադարանի պարսկերեն վավերագրերը, մաս III, Շարիաթական նոտարական փաստաթղթերը (ԺԷ.-ԺԸ. դդ.)*, Երեւան, 2018, վավ. 10:

⁴⁰ Այս վավերագրի բնօրինակը պահվում է Մատենադարանի կաթողիկոսական դիվանում եւ հրատարակվել է (տե՛ս Ք. ԿՈՍՏԻԿՅԱՆ, *հրովարտական, պրակ V*, վավ. 8):

ՀԻՄՆԱԲԱՌԵՐ

Պարսկերեն պատմական փաստաթղթեր, կաթողիկոսական դիվան, հրովարտակ, վակֆային կալվածք:

РЕЗЮМЕ

В статье исследована историческая ценность некоторых персидских документов, хранящихся в архиве Первопрестольного Святого Эчмиадзина, их связь с персидскими документами из архива католикосата, хранящегося в Матенадаране. Среди этих документов указы Сефевидских шахов Аббаса II и Тахмаспа II. По своему содержанию исключительную ценность для истории Армянской Церкви представляет указ Хусейн Хана Ереванского от 1760 г., подтверждающий права и привилегии Первопрестольного Святого Эчмиадзина. Данный указ изложен в тринадцати пунктах прошения католикоса Акопа Шамахеци. Четыре документа названной коллекции дополняют историю монастыря Святого Степанноса в Дарашамбе, оказавшегося в тяжелом положении после эмиграции местного армянского населения в 1828–1829 гг. Документы, составленные в шариатском суде, отразили довольно сложный процесс приобретения села Дарашамб в качестве вакуфного имущества данного монастыря при содействии наследного принца Аббаса Мирзы – правителя региона. В статье представлены также аннотации всех известных нам 17-и персидских документов, хранящихся в архиве Святого Престола.

SUMMARY

The article considers the historical value of some Persian documents kept in the archive of the Mother See of Holy Etchmiadzin, the links between these documents and the ones kept in the Archive of the Catholicosate kept in the Matenadaran. The decrees of the Safavid Shahs Abbas II and Tahmasb II are among those considered in the article. The decree of Huseyn Khan of Yerevan dated 1760 and the confirmation of the rights and privileges of Holy Etchmiadzin, mentioned in 13 points of the petition of Catholicos Hakob Shamakhetsi, is of great importance for the history of

the Armenian Church. Four documents of the collection refer to the history of St. Stepannos Monastery and supplement it. The state of the monastery was very hard after the migration of local Armenians in 1828–1829. The documents composed in Shari'yya court have reflected the compound process of the establishment of the village of Darashamb as vaqf property of the monastery through the assistance of crown prince Abbas Mirza. The article contains also the list of annotations of 17 Persian documents, known to us, and kept in the archive of the Mother See of Holy Etchmiadzin.

